

Morning Dogri (NSD) National News Bulletin 16-02-2025

आकाशवाणी

- प्रधानमंत्री नरेन्द्र मोदी होरें आखेआ ऐ जे भारत ना छड़ा वैश्विक भविष्य गी लेइयै चर्चाएं दे केन्द्र च ऐ सगुआं इस चर्चा दा नेतृत्व बी करै करदा ऐ।
- दिल्ली रेलवे स्टेशन पर मची दी नस्सपज्ज च 15एं जनें दी मौत, केई घायल। राष्ट्रपति ते प्रधानमंत्री होरें हादसे पर दुख प्रगट करदे होई घायलें दे तौले नरोए होने दी कामना कीती।
- विदेश मंत्री डॉ. एस.जयशंकर होरें म्यूनिख च नार्वे दे खजाना मंत्री हुंदे नै मलाटी दरान कुलसंसारी सुरक्षा ढांचे बारे बचार बंटादरा कीता।
- अमरीका नै घोषणा कीती ऐ जे यूरोप, यूक्रेन दी शांतिवार्ता च हिस्सा नेई लैग।
- महिला प्रीमियर लीग 2025 दे इक मकाबले च कल दिल्ली कैपिटल्स नै मुंबई इंडियन्स गी दऊं विकटें कन्नै हराया।

<><><><><><>

PM Summit

प्रधानमंत्री नरेन्द्र मोदी होरें आखेआ ऐ जे भारत ना छड़ा वैश्विक भविष्य गी लेइयै चर्चाएं दे केन्द्र च ऐ, सगुआं इस चर्चा दा नेतृत्व बी करा'रदा ऐ। दिल्ली च इक मीडिया हाउस आस्सेआ आयोजित शिखर सम्मेलन गी संबोधत करदे होई श्री मोदी होरें आखेआ जे भारत गी वैश्विक सतह पर ओह थाहर थहोई ऐ जेहड़ी पैहले कदे बी नेई थहोई ही। उनें जोर दिंदे होई आचोआ जे भारत 2014 कोला बी तेजी कन्नै विकास दी राह पर अग्रसर ऐ। प्रधानमंत्री होरें आखेआ जे अज्ज वैश्विक मंचे पर भारत दा आत्म विश्वास पैहले शा केई गुणा मता मजबूत ऐ।

<><><><><><>

PM-India Textile 2025

प्रधानमंत्री नरेन्द्र मोदी होर अज्ज नमीं दिल्ली च भारत टैक्स 2025 प्रदर्शनी च जांगन। मोदी होर इस मौके पर लोके गी संबोधत बी करगंन।

14 फरवरी कोला शुरू होई दी एह प्रदर्शनी 17 फरवरी तगर चलग। एहदे च कच्चा माल, तैआर उत्पाद ते सहायक उपकरणों दी पूरी टैक्सटायल मूल्य श्रृंखला इक गै थाहर उप्पर उपलब्ध ऐ। भारत टैक्स वस्त्र उद्योग दा सब्बने शा बड़डा ते व्यापक कार्यक्रम ऐ। एहदे च 2 थाहरें उप्पर विशाल प्रदर्शनी ते पूरे टैक्सटायल इकोसिस्टम गी प्रदर्शित कीता गेआ ऐ। इस दरान 70 कोला मते वैश्विक स्तर दे सम्मेलन बी आयोजित होंगन। प्रदर्शनी च विशेष नवाचार ते स्टार्टअप मंडप बी होंगन। इस कार्यक्रम च नीतिनिर्माताएं ते केई कंपनिएं दे मुख् कार्यकारी अधिकारी बी हिस्सा लेंगन। एहदे च 5 जहार कोला मते प्रदर्शक ते 120 कोला मते देशे दे 6 जहार अंतर्राष्ट्रीय खरीददारें दे हिस्सा लैने दी मेद ऐ। इस आयोजन च अंतर्राष्ट्रीय वस्त्र निर्माता संघ ते अंतर्राष्ट्रीय कपास सलाहकार समिति सनें दुनिया दे 25 कोला मते प्रमुख वैश्विक वस्त्र निकाय ते संघ बी हिस्सा लेंगन।

<><><><><><>

Delhi Accident

नमीं दिल्ली रेलवे स्टेशन पर कल संजा बनी गेदी नस्सपज्ज आली स्थिति दे चलदे 15 जनें दी मौत होई ते केइएं दे घायल होने दी जानकारी ऐ। अधिकारिएं दस्सेआ ऐ जे एह नस्सपज्ज स्टेशन पर प्रयागराज जाने आले श्रद्धालुएं दी चानचक्क भीड़ जमा होने कारण मची जेहडे काहली-काहली च पैहले गड्डी पर चढ़ने लेई नस्सन लगी पे। प्रधानमंत्री नरेन्द्र मोदी होरें इस हादसे पर गैहरा दुख प्रगट करदे होई आखेआ जे ओह इस हादसे च होए दे जानी नुक्सान करी दुखी न ते मरोने आलें दे परोआर आलें कन्नै उंदी पूरी हमदर्दी ऐ। उनें हादसे च घायल होए दे लोकें दे तौले नरोए होने दी बी कामना कीती। इक सोशल मीडियो पोस्ट च रेल मंत्री अश्विनी वैष्णव होरें आखेआ ऐ जे हुन हालात पूरी चाल्ली काबू च न ते स्टेशन पर रेलगड्डियां आम दिनें आला लेखा पूरी रमानदारी ते बवस्था आले एंगै सिर चलै करदियां न। उनें दस्सेआ जे रेलवे स्टेशन पर रश गी घट्ट करने लेई प्रयागराज लेई बाद्धू 4 रेलगड्डियां लाइयां गेइयां न। राष्ट्रीय आपदा मोचन बल दियां टीमां बी राहत उपाए ते प्रबंधन दे कम्में च लग्गी दियां न। गृहमंत्री अमित शाह होरें रेल मंत्री ते दिल्ली दे उपराज्यपाल हुंदे नै गल्ल करियै पूरी जानकारी हासल कीती ऐ। दिल्ली दे उपराज्यपाल वी. के.सक्सेना होरें अस्पताल जाइयै घायलें दी डौल पुच्छी। रक्षा मंत्री राजनाथ सिंह होरें बी हादसे पर दुख प्रगट करदे होई घायलें दे तौले नरोए होने लेई प्रार्थना कीती।

<><><><><><>

President

राष्ट्रपति द्रौपदी मुर्मू होरें नमीं दिल्ली रेलवे स्टेशन पर मची दी नस्सपज्ज आली घटना पर गैहरा दुख प्रगट कीता ऐ ते इस हादसे च मारे गेदे लोकें दे परोआर आलें कन्नै दित्ती हमददी प्रगट करदे होई घायलें दे तौले नरोए होने दी कामना कीती ऐ।

<><><><><><>

EAM

विदेश मंत्री डॉ. एस.जयशंकर होरें म्यूनख च नार्वे दे वित्त मंत्री जेन्सस्टोलटेनबर्ग हुंदे कन्नै मलाटी कीती। मलाटी दरान दवै नेताएं वैश्विक सुरक्षा ढांचे पर इक उपयोगी आदान प्रदान कीता। विदेश मंत्री होरें अर्जेटीना दे विदेश ते बपार मंत्री गेराडो वर्थीन हुंदे कन्नै बी मलाटी कीती। इक सोशल मीडियो संदेश च विदेश मंत्री होरें आखेआ जे उनें भारत दे अर्जेटीना दे दरम्यान बपार ते निवेश गी होर बाद्धा विस्तार करने लेई चर्चा कीती। उनें वैश्विक मामलें बारे बी बचार बंटाधरा कीता।

<><><><><><>

Kashi-Tamil

तमिलनाडू ते काशी बश्कार सांस्कृतिक ते बौद्धिक सरबंधे गी बढावा देने दी पैहल काशी-तमिल संगमम दा त्रीआ संस्करण वाराणसी च शुरू होआ। केन्द्री शिक्षा मंत्री धर्मेन्द्र प्रधान, सूचना ते प्रसारण राज्य मंत्री एल.मरुगन ते उत्तर प्रदेश दे मुख्मन्त्री योगी आदित्यनाथ होरें उहदा रस्मी तौरा पर उद्घाटन कीता। बक्ख-बक्ख मंत्रालयें ते उत्तर प्रदेश सरकार दे सैहयोग कन्नै शिखा मंत्रालय आस्सेआ आयोजित इस पैहल दा मकसद उत्तर ते दक्खन भारत दिएं संस्कृतिएं ते परंपराएं बयकार सरबंधें गी निग्गर बनाना ते टकोहदा करियै तमिलनाडू ते काशी बश्कार प्राचीन सभ्यता दे रिश्तें गी मजबूती देना ऐ।

<><><><><><>

US-Ukrain

अमरीका नै घोशणा कीती ऐ जे यूरोप यूक्रेन दी शांतिवार्ता च हिस्सा नेई लैग। अमरीकी राष्ट्रपति हुंदे सहायक ते “रूस ते यूक्रेन” लेई विशेष दूत कीथ केलॉग होरें जर्मनी दे म्यूनख च आयोजित कुलसंसारी सुरक्षा सम्मेलन दरान एह ब्यान दित्ता। कीथ केलॉग होर राष्ट्रपति डोनाल्ड ट्रंप हुंदे इस क्षेत्र च शांति ब्हाली दे उद्देश्य गी अगडे बधाने लेई 22 फरवरी तक यूरोप दे बक्ख-बक्ख मुल्खें दे दौरे पर न। केलॉग हुंदा एह ब्यान अमरीका आस्सेआ यूरोपी मुल्खें गी सुआलें दी इक लिस्ट भेजे जाने दे बाद आया ऐ जेहदे च पुच्छेआ गेदा हा जे ओ यूक्रेन लेइ सुरक्षा गरंटी च केह योगदान देई सकदे न। एहदे शा पैहले यूक्रेन दे राष्ट्रपति वोलोडिमिर जेलेंस्की होरें यूरोपी फौज दा आह्वान करदे होई तर्क दित्ता हा जे यूरोप हुन अमरीकी सुरक्षा दे सहारे निर्भर नेई रेही सकदा।

<><><><><><>

Surajkund

हरियाणा दे फरीदाबाद च लग्गे दे 38में सूरजकुंड अंतर्राष्ट्रीय शिलपकजा मेले च बड़ी बद्ध गिनतरी च लोमक आवै करदे न। इस ब'रे मध्यप्रदेश ते ओडिशा मेले दे भ्याल राज्य न। मेले च कोई 42 मुल्खें थमां कोई 600 प्रतिभागी हिस्सा लै करदे न, जिंदे च मिस्र, इथियोपिया, सीरीया, अफगानिस्तान, बेलारूस, बंग्लादेश, भूटान, मयामार, नेपाल, श्रीलंका ते थाईलैंड बी शामिल न।

<><><><><><>

Women Cricket League

क्रिकेट च महिलाएं दे प्रीमीयर लीग दे इक रोमांचक मकाबले च दिल्ली कैपिटल्स नै मुंबई इंडियन्स गी दऊं विकटें कन्नै हराइयै मैच अपने नां करी लैता। बड़ोदरा दे कोबम्बी स्टेडियम च कल रातीं खेड्डे गेदे इस मैच च मुंबई इंडियन्स दी टीम नै पैहले बल्लेबाजी करदे होई 19.1 ओवरें च 164 रंज बनाए। लक्ष्य दा पिच्छा करदे होई दिल्ली कैपिटल्स दी टीम नै 8 विकेटें दे नुकसान उप्पर 20एं ओवरें च 165 रंज बनाइयै मकाबला जित्ती लैता।

<><><><><><>

Nadda

बीजेपी दे अध्यक्ष जे.पी.नड्डा होरें कल नमीं दिल्ली च बीजेपी मुख्यालय च पार्टी महासचिवें कन्नै बैठक लाई। बैठक च पार्टी महासचिव बी.एल.संतोष, विनोद तावडे, तरूण चुग ते होर नेता बी शामिल होए। दिल्ली विधानसभा चुनां जित्तने दे बाद बीजेपी केई स्तरें पर बैठकां करा करदी ऐ जिंदे च दिल्ली दा नमां मुखमंत्री चुनने लेई सोच बचार कीता जा'रदा ऐ।

<><><><><><>